

蜀

碧

蜀碧卷三

起乙酉
止丁亥

丹溪生彭遵泗磐泉編述

乙酉順治二年○時賊竊據全蜀

春正月舉人劉道貞以兵復邛不克賊滅其家○初道貞
攻賊於小關山賊還據邛至是道貞謀恢復命子聯度以
兵來爭賊搜獲道貞妻王氏環刀械頸令招其子王氏大
罵不從賊分其屍投之城外舉家百口俱死聯度亦以戰
歿

時賊脅縣州諸生葉大賓牧邛大賓佯受之密通紳士軍

民相時舉事始以計給賊將曰蒲江要害聞有警須調兵往賊信之分其衆千餘去翌日又曰大邑隸邛係將軍責恐有變亦宜調兵往又分其衆千餘去賊衆既分大賓矯令殺賊帥潰其卒三千保護州民萬餘奪西門而去

三月故明諸臣起兵攻叙州取之○初閭部巴縣王應熊奉永明王命總督川湖雲貴軍務而辦川寇時諸郡惟遵義為王祥所守未破應熊入居之縞素誓師開幕府傳檄討賊而總督宜賓樊一蘓適至命諸郡舊將會師大舉起甘良臣為總統副以侯天錫屠龍令叅將楊展遊擊馬應

試余朝宗所携潰卒得三萬人是年三月攻叙州斬賊數千級走偽都督張化龍復其城馮雙禮來爭又敗之孫可望來援相持一月一蕪糧盡退屯古蘭州展退屯江津賊迺截朱化龍於羊子嶺化龍率番兵衝擊之賊驚潰遁去是時副將曾英叅政劉鱗長及部將于大海李占春張天相等方破賊於重慶屬兵十餘萬來奉一衛節制

李研齋長祥記云獻忠陷成都蜀殘甲並草澤間諸忠勇合兵中江射洪間約十餘萬阻山壁水整飭甲冑獻忠忌之時閣部王應熊駐師遵義去中江射洪千餘里呼應不

及王又慎情名器蜀之來言情與請劄付者多不遂意軍中舊官稱官他惟稱義士無以臨衆忽傳山中有王內江王也使人視之容貌顧盱英雄異常軍中大喜思得王監國不受閭部節制共往迎王王至歡呼相賀因請視事王不得已任之遂於軍中設官職定尊卑安養百姓訓勵士馬十餘萬衆無不帖然者軍中亦為王建行宮選后妃備宮女募內侍又拔戰十充御營亡何賊至出師與戰大敗數戰數敗軍中搖動王迺自將兵出戰大捷賊益兵來王又出戰又大捷生擒數百人降千餘人王皆編入御營中

一日獻忠自以大隊至對壘未合戰御營兵噪各營驚亂獻忠自外攻擊御營從內殺出十餘萬兵斬艾奔竄盡矣內江王蓋賊也獻使之來偽為王以破壞我師者

雅州知州王國臣以州降賊○國臣西安人初通閩將馬燦繼又歸獻忠先與下南道胡寅不睦將執以與賊寅逃入土司高克禮家而土司楊姓者與高世仇互相攻殺楊之裔又欲因亂弑兄之明降賊遂執胡寅並家口數十人送獻忠殺之

天全六番招討使楊之明成都進士朱偉尹川北舉人鄭

延爵起兵拒賊敗績俱死之○之明等合謀起兵與賊戰於雅州飛仙關兵血俱擒為賊剛於會城南門外延爵逃至總崗山收兵再戰沒於陣

黎州宣慰司馬京及弟亭起兵討賊○初賊以蜀人易制惟黎雅間土司難於驟服用降人為招誘鑄金印齎之易其章馬京者漢將馬岱後也年十六得印擲之地指眾不服時偽遊擊苗姓率眾赴黎雅任京密令通把調集番眾與亭攻之擒偽弁七十餘人於演武廳申明大義斬首祭旗起兵討賊

馬京馬亭及土千戶李華宇指揮丁應選富庄七姓與賊戰於龍觀川大破之斬其偽帥方總兵○京兄弟起兵全白通使及白窠翠招致富庄七姓子弟頭人姜黃奈李蔡包張等土千戶李華宇者年八十矣亦率衆至京即以七姓昇之而海棠堡指揮使丁應選寧越守備楊起泰以觀察胡恒之機引兵入援聞恒死遂與京兄弟合得兵萬餘至雅州蘄川對岸與賊大戰殺數千人陣擒偽帥方總兵斬之賊敗歸京遂恢復黎雅

賊大殺偽從官○初孫可望自漢中還時偽官連名狀迺

之於郊可望不敢隱陳之獻怒其沿故朝陋習按名棒殺
二百人忽一日殺從官三百或言其太甚獻曰文官怕沒
人做耶因朝會拜伏呼葵數十下殿葵嗅者引出斬之名
曰天殺又創為生剝人法若皮未去而先絕者刑者抵死
偽兵書龔完敬以道不治用前法剝實以蒙衣冠以狗
於市一祭酒某以生辰受諸生禮僅值十錢其誅法一如
完敬名諸生集而觀之偽禮書江鼎鎮以郊天祝版不敬
杖之百閤門自經死右相嚴錫命家在縣州獻過其地見
宅第壯麗即命斬之

賊大殺紳士○賊各州邑安置偽官查檢鄉紳學校詭云
選舉用軍令嚴催止道不至者孥戮並坐比隣既集令之
由東門入西門出盡斬之

賊集諸生出新製黃旗縱橫各一丈令書滿幅大帥字畫
欲如斗又一筆揮成能者免死夾江生員王志道縛艸為
筆以大缸貯墨濡濡三日提出直書不與毫髮獻熟視曰
爾有才如此他日圖我者必爾也立用祭旗志道一字念
泰夾江學生工書死時年二十七余外曾祖也

賊詭稱試士於貢院前左右設長繩離地四尺按民序立

凡身過繩者悉驅至西門外青羊宮殺之前後近萬人筆
硯委積如山惟二士年幼不及繩留作書記一忘其名一
嘉定歐養直也

後賊奔川北挾之以行鳳凰山之敗脫身歸流寓丹稜與
余叔祖連姻所作紀亂一書載獻事頗詳今無存矣

又詭試武生時禁民間畜馬武生之至者命集教場出鹿
馬最瘠劣者千餘驅之使騎甫乘合營大噪發巨炮振金
鼓馬奔人墮踐踏成泥賊撫掌大笑

一云賊稱帝成都以出兵數敗攘袂瞑目思咀嚼蜀人會

朝天關獲諸生顏天漢等通書自成大怒因殺士於青羊宮

或云獻兒時隨父販棗至內江以鹽繫紳坊糞溺汚石柱紳僕罵之鞭獻父喝令以手拘付他所時獻在旁怒目不敢爭臨去誓云我復來時盡殺爾等方洩我恨

或云獻忠敗於鄭陽竄伏深山飢窘聞某寺僧饒錢穀劫之時有諸生數十在寺肄業皆避去而寺僧擅奉勇者百餘人相與謀曰我等出敵彼敗終不忘情不如嫁禍他人也遂著諸生巾禦賊賊大敗死者頗衆以是積怨士子遷

戮於蜀

蜀民共起殺偽守牧令判等官○賊所破郡邑置守牧令判等官緝捕百姓時四方兵大起民之荼毒未盡者斬木揭竿糾集殺賊一時偽官或刺於庭或生畀之火或投之水幾於殆盡

秋七月賊屠成龍二屬州邑○初賊自為聖諭六言云天以萬物與人人無一物與天鬼神明明自思自量命右相嚴錫命作註辭發明之刻諸石至是與偽相汪兆麟謀遣馬元利張能奇等分剿成龍所屬州邑並長吏誅之其到

處有烟火者將吏必斬其偏裨不忍行刑多自經於道路
有一縣人先期聞之向酒家索醉聽死酒家一日累千金
初大喜繼又大慟皆以手委股以就割剝無一人得或免
者

偽撫南劉文秀屠邛州○文秀復至邛取遺民萬餘家悉
屠之又殺僧道千人於是行盡剿法立搜山望烟等頭目
踪跡高山大谷有匿崖洞者舉火薰之邛蒲二百里盡為
血肉之場矣

劉文秀入丹稜屠之○賊陷丹稜踞其署驅城中民於西

門外濟橋殺之屍與橋平水為之 又遣兵搜鄉以長繩
聯絡男婦姦數十為一羣賊前後各一人跨刀執杖擁至
江陵廟殲焉遂剗北門山為教場操兵三月而去

先大父五吾公諱萬崑時謀拒賊偽持牛酒偵賊營門軍
止焉縛見酋以計免且給賊旗持歸聚壯勇守險阨賊入
鄉者輒殺之一日有打糧賊三百人突至設伏擒獲誅之
於三溪口賊不敢近一鄉獲全

賊入洪雅○邑人祝之茂妻楊氏之至妻妾二陳氏之恒
妻宿氏之郭妻王氏少女祝氏皆庠生祝錢之媳與女也

避亂山中為賊所劫六氏拜別父母俱投水死

邑人余飛率眾破賊於花溪○花溪去縣四十里背枕飛仙關前面青衣水極為險要賊至飛誓眾拒之預伏壯勇數百人於山谷而以羸弱者誘賊賊遂入隘中伏發急不得出飛奮勇截殺斬獲二千人賊大沮喪沿江遁

賊攻南安鎮千總周鼎昌大破之奔遠成都○賊由青衣江下夾江攻南安鎮邑人周鼎昌以千總奉閣部王應熊檄來保鄉里監木為城率眾拒守賊攻不下因作浮橋為長圍計鼎昌令善泅者潛泳水中而腰鑣以斷橋絡賊將

平沉水中餘賊友奔南岸鼎昌感攻之賊大敗北其所掠喪亡幾盡奔遠成都不復至

賊除成都居民○初賊陷成都大殺三日以孫可望諫少止因列兵為甬道簡閱其民壯男少婦還入營中民間父子夫婦皆失散無復聚者已而遣兵四出脅令歸誠所在郡邑建官分理征輸苛暴殘殺日滋民心憤畏合謀拒賊逐殺偽官獻遂詐言於衆曰有天書夜墜庭中命我剿絕蜀人違者罪不細因聯百姓十人為一縛驅至中園盡殺之○中國先主昔日練兵處也

冬十有二月賊殺醫僧匠役○太醫院有舊製銅人賊以
積幕其闕竅名諸醫至考驗鍼砭內有一穴差者立死上
時業醫者皆盡

太慈寺僧近千人初因葺一宗室閭寺俱斬至是並拘會
城內外寺院僧道戮之

初蜀織工甲天下特設織錦坊供御用而蜀始封獻王好
學招致天下名刻書傭集成都故蜀多巧匠至此盡於賊
手無一存者或曰孫可望獨留錦工十三家後隨奔雲
南今通海綴其遺製也

丙順治三年○是歲十有二月獻忠伏誅

春正月初五日賊將狄三品等屠眉州○先是乙酉十月賊遣偽帥狄三品等駐眉是年正月初五日忽下令驅城中人集道姑巷原田壩上至則以兵圍之數重凡五千餘人悉殺之

時賊入川南先期傳令云除城盡剿民不悟以為入城可免也扶老挈幼求避城中故賊至得聚而殺之而城中居人或知其故預有兔脫者

眉民陳登昨倡義破賊於醴泉河又破之於東館賊遁○

登皞眉州里民混字鐵脚板憤賊殘酷裂衣為旗招集四鄉遺民得數千樹柵醴泉河上賊攻之登皞率衆白梃鋤稷一戰殺賊三百賊懼從間道潛移東館登皞復遣壯士持酒米雞豚迎於道賊納之營中夜半襲賊營壯士從中鼓噪殺出賊大駭競奔復斬首數百級賊遠遁登皞自是以鐵勝名營倡義者悉歸之二年中無一騎敢犯境者後為嘉定向成功所殺成功亦當時起兵拒賊人也

三月叅將楊展恢復川南○初賊取嘉定置偽官守之展起師潛身入捷為擒殺偽令州人間爭開門迎展偽太守

逃去展遂取嘉定獻遣劉文秀狄三品來攻為展所敗退
回成都展遂合遊擊馬應試盡復嘉眉邛雅諸州邑于時
故總兵賈聯登及中軍楊維棟取資簡侯天錫高明佐取
瀘州李占春于大海守涪陵其他據城邑奉調者洪雅則
曹勛及監軍范文光松茂則監軍僉事詹天顏夔萬則譚
弘譚誼樊一衡移駐納谿居中調度與督師應熊會瀘州
檄諸路刻期並進獻始畏懼

賊殺所獲婦女小兒○賊以婦女累人心悉令殺之有孕
者剖腹以驗男女又取小兒每數百為一羣圍以火城貫

以矛戟視其奔走呼號以為樂

賊分道搜殺四路遺民○則以遺民逐殺偽官而四方兵漸益日迫忿然曰川人尚未盡耶自我得之自我滅之不留毫末貽他人也于是令偽帥孫可望等四將軍分道出屠窮鄉僻壤深崖峻谷無不搜及得男手足二百雙者授把總女倍之官以次進階可望等或日殺四五縣不等童稚手足不計止計壯男女手足寅出酉還比賞格有踰十倍者獎以為能有一卒日殺數百人立擢至都督嗣後賊營公侯伯甚多皆屠川民積功所致也正月出五月回上

功疏可望一路殺男女若干萬文秀一路殺男女若干萬
定國一路殺男女若干萬能奇一路殺男女若干萬獻忠
自領者名為御營老府其數自計之人不得而知也又有
振武南廠七星治平虎賁虎威中廠八卦三奇隆興益戈
天討神策三才太平志正龍韜虎略決勝宣威果勇等營
分居川南川北而王尚禮在成都復收近城未盡之民填
之江中蜀民於此真無孑遺矣

賊檢校衛軍及各營新兵○獻賊復檢各衛軍及各營新
兵年十五歲以上者殺之各路會計所殺衛軍七十五萬

有奇兵二十三萬六千有奇家口三十有三萬成都北威鳳山起至南門桐子園綿亘七十里餘屍積若喬嶽然

賊攻川南諸州縣俱大敗而四洩怒士卒以婦女財物累衆軍心不肯致死移營之日有金銀必棄有婦女必殺其留屯久者或已成夫妻有子女軍行發令輒大慟毀中園一浮圖穴其下置礮崩之兵之壓而死者萬人又伐木造船數千由山路曳入水或數十里或百里稍急而休者立死若闔營犯法裝大艦沉之江中于是左右親信各生畏心矣南門營中大營兵懼誅開門散走差豹韜等四營追

及於大儀三千餘人盡坑之

獻忠欲北行入陝惡其黨太多曰吾初起草澤從者五百人所至無敵今日益多前年出漠中為賀珍所敗非為將者習富貴不用命即為兵者有所貪戀懷二心吾欲止留發遣時舊人即家口多者亦汰之則人人自輕便所向無前汪兆麟慙史之曰恐兵知而先謀奈何不若先立法責之各將軍都督等多置邏者以伺察營伍有偶語者及微過俱置之法并連坐如此則殺之有名無覺者矣密議已定諸營尚未知猶習故態角射酗酒縱博嬉笑怒罵如平

時邏者至輒收治自誣服並及其家是日所殺即十餘萬
人于是人人惴惴無敢出一言者邏者無所得每於夜靜
踰垣穴壁入伏雷下及床第幃幕間竊聽但有笑語即躍
出收繫并其家属之

賊大殺也都督總兵等官○偽總兵溫自讓延川人不忍
無辜戮其下棄妻子夜率所部百餘遁去獻自引驍騎追
之自讓走脫所部兵俱自殺他如偽右軍都督米脂張君
用八卦營汝州王明振武營麻城洪正隆隆興營涇陽郭
胤三奇營鳳陽宋官永定營合肥郭尚義三才營山東婁

文千城營六安汪萬象援剿營寶雞彭心見決勝營周尚
賢定遠營張成中厥營萬縣杜興文英勇營黃崗張其在
天威營問封王見明龍蠡營麻城商元及志義天討金戈
神策虎威虎賁豹韜虎略等營總兵失其名俱以搜括無
功坐狗庇誅殺或剥皮死并其家口部落盡斬於河

賊嗜殺出天性偶夜靜無事忽云此時無可殺者遂令殺
其妻及愛妾數十人惟一子亦殺之令索嚴無敢爭者晨
興召諸妻妾左右以告則又怒其不言舉左右奴隸數百
人悉殺之嘗怒目視一童子時易病二日死其殘虐如此

又禁不得私藏金銀有至一兩者家坐誅十兩者生剝其皮人或沉井中或窖幽室被殺亦按連坐法告捕者即以
其家妻妾馬匹給之于是豪奴悍婢爭訟其主焉

賊天性特與人殊恒醉柔而醒暴一日不流血滿前其心
不樂嘗厭苦朝會擲所御冠舉足蹈其中索侍者帽著之
迺快

殺人之令有以語犯死者有以事犯死者有令徒卒羅織
而按戶以死者有言事小兒夜行街巷聽人陰談白壁識
其門而收之以死者一小兒聞人俚語曰張家長李家短

具陳之獻獻笑曰此我家勝自成之兆也遂命釋焉

殺人之名割手足謂之鉅奴分夾脊謂之邊地鎗其背於空中謂之雪鰵以火城圍炙小兒謂之貫戲抽善走之筋斫婦人之足碎人肝以飼馬張人皮以懸市

又剥皮者從頭至尻一縷裂之張於前如鳥展翅率踰日始絕有即斃者行刑之人坐死

賊盡墮州邑城○遣偽將分墮之

按獐牛犬○時令取犬牛盡磔之毋為後人遺種

參將楊展大破賊於江口焚其舟賊奔還○獻閱展兵勢

甚盛大懼率兵十數萬裝金寶數千艘順流東下與展決
我且欲乘勢走楚變姓名作巨商也展開逆於彭山之江
口縱火大戰燒沉其舟城奔北士卒輜重喪亡幾盡復走
還成都展取所遺金寶以益軍儲自是富強甲諸將而至
今居民時於江底獲大鞘其金銀鑄有各州邑名號
王祥曾英以兵趨成都○王祥綦江人勇悍著聞為九圍
子隘官守導義賊不敢窺至是與曾英進兵討賊賊益畏
蜀將遂決意行矣

賊毀藩府走川北○獻自江口敗還勢不振又聞王祥曾

英近資簡決走川北將所餘蜀府金銀鑄餅及瑤寶等物
用法移錦江銅其流穿穴數仞實之因盡殺鑿工下土石
淹蓋然後決堤放流使後來者不得發名曰銅金又盡毀
官殿墮砌堙井焚市肆而逃

時府殿下有盤龍石柱二亦名擎天柱賊行取紗羅等物
雜裹數十層以油浸之三日後舉火烈焰冲天竟一晝夜
而柱枯折

楊展追賊於漢州不及封遺骨而還○展聞賊逃急引兵
追之至漢州賊已去遠因盡收暴莽骸骨叢葬焉識其碣

曰余奉命討賊提師過此憐爾白骨之慘用加黃壤之封
冬十有二月

王師西征追賊於鳳凰山擊之獻忠伏誅○賊保寧守將劉進
忠部下多蜀人獻忠至惡之謀坑其衆漏言於聞者進忠大
恐獻忠又下偽詔用秦人鄙語罵進忠進忠忿怒時我
朝肅王方奉 命西征至漢中進忠赴師迎降

王問獻忠所在曰在南充西充交界金山鋪去此千餘里馳五
晝夜可及 王命漢師疾行至西充之鳳凰山會大霧

王潛勒軍登山賊謀者知之以告獻忠素驕又以進忠守朝

天關不虞 大兵之至也斬謀者以徇曰此羣徭求食耳
清兵豈能越朝天關耶少頃又告又斬之三報亦斬 王
詢得之揮鐵騎促賊營時方辰食獻衣飛蟒半臂含飯率
牙將數十人倉皇出視進忠指善射者章京雅布蘭射之
一矢中其喉拔矢視之曰果然清兵也逃伏積薪下我兵
尋得曳出縛之 王迺拔佩刀仰而祝天曰獻忠罪惡滔
天毒流萬姓予受

天子命奉行天誅謹敢為百姓復仇祝訖親加刃於獻忠殺之尸
之轅門士女往斫之骨肉糜爛殆盡獻臨誅猶怒目視其

部下之降者四養子兵潰東走 一說獻忠被射時拔箭在手向陣大言曰咱生在燕子嶺死在鳳凰山伏殺而斃獻在成都忽謂今入厄運三年中莫可支吾獨有遜世埋名入深山苦修數載可免耳過此乃橫行天下欲入武當為道士不果伏誅時年四十二

初成都東門外沿江十里有鎖江橋橋畔有迴瀾塔萬歷中布政司使余一龍所建獻登其上見內城宮殿語從官云橋是弓塔是箭彎弓正射承天殿遂命毀之就其地修築將臺穿穴取磚至四丈餘得一古碑上有篆文云修塔

余一龍拆塔張獻忠歲逢甲乙丙此地血流紅妖運終川
北毒氣播川東吹簫不用竹一箭貫當胃炎興元年諸葛
孔明記至 肅王督師攻獻於西充射殺之迺知吹簫不
用竹蓋肅字也

獻初破武昌有大志不甚殘殺改府曰天授江夏縣為上
江縣鑄西王之寶嘗題詩黃鶴樓令其下和之以周文江
為兵部尚書張其尊為前軍都督李時榮為巡撫湖鳳洲
為守道蕭彥為巡道陳六馭為學道給偽勅印各予賞賜
有差開科取七十八人補二十一州縣詐收人心未若入

蜀之酷烈也

甲申十一月初十賊忽驅人至成都東門外洪順橋殺之
舉刃時迅雷奮擊者三獻怒指天曰爾放我下界殺人今
迺以雷嚇我耶用三炮還擊之是日死骸激水橋為之折
或曰即今九眼橋獻所復修者

獻敗時有侄某潛身削髮隱於灌縣之三十六峰號范和
尚世定後時時出遊余伯楚錫公珩遇之問賊曩事云獻
忠初起原圖脫禍無意殺人至湖廣率同輩五六夜盜武
甯山大廟金頂甫上見王靈官持鞭喝云快去若非上帝

放汝收生定打殺汝因此有負為奉天殺人云爾獻侄面上有火藥燒痕故號疤和尚問其名終不答康熙四十年其人尚在

或云殺諸生時每人給一元寶令頂於首東入西出斬一生取一寶回笑曰欲賣頭乎殺爾還是我的

賊每屠一方備記所殺人數斯竹園中人頭幾大堆人手掌幾大堆人耳鼻幾大堆所過處皆有記

賊遇病弱者多割鼻斫手斫手之令男左女右若誤伸者兩手俱斫至小兒幼女棄道旁襁馬足或擲之空中以死

迎之

賊酷好朋友遇相知徹夜歡飲不懈及去厚贈之而預遣人伏中途斬其首歸納櫝中載之以隨軍中獨飲不樂令人啟櫝曰請好友來取頭遍列席間持盞酌勸款洽若對生人者名為聚首歡宴

賊斫婦女小足疊累成峰與愛妾酣飲其下忽仰視云更得一足合尖方好妾舉足戲曰此何如獻云使得立命斫之

一云賊偶沾瘡疾對天曰疾愈當貢朝天蠟燭二盤衆不

解也比疾起令斫婦女小足堆積兩峰將焚之必欲以最
窄者置於上遍斬無當意者忽見已之妾足最窄遂斫之
灌以油燃之其臭達天獻以為樂

賊殺人時有義眉張姓者為賊殺於南關外頸裂而喉未
殊伏積屍中夜定後見有呵道來者威儀赫奕儼如王公
既至今吏持冊按名點屍每一呼死者提頭起立點畢去
張訝其無名起詢從者云府都城隍也張隨蘇沿堤渠伏
行數十里天明逸去至康熙六十年尚存頸上刀痕宛然
人呼為張斫頸子孫甚眾亦有登岸者與人言獻忠時

事

或云賊欲屠保寧府屬禪僧破山為民請命賊令持犬豕肉以進曰和尚噉此者從汝破山曰老僧為百萬生靈忍惜如來一戒乎遂嘗數齋賊因免之

賊所過處公廨民居園林亭館寺觀樓閣悉為瓦礫所存者惟文昌關帝二祠蓋關帝秦人所尊而文昌則彼推尊為太祖高皇帝者也故重修七曲山大廟又建關帝祠於東皆極鉅麗

或云獻過梓潼夢文昌帝君儼之欲致祭令士人為文獻

不解輒殺之蜀士被禍甚衆後屢易皆不屬意獻大聲曰
咱自做咱念爾輩書之其文曰咱老子姓張爾也姓張為
甚嚇咱老子咱與爾聯了宗罷尚享至今川人常以為笑
又云獻初過梓潼夜夢人以宗弟紅東來謁誠以勿殺邑
民晨起詢人曰此文昌帝君也神姓張獻云咱一家兄弟
人何忍殺之梓潼得全

羅江縣南落鳳坡有漢龍鳳二公祠祀武侯龐士元獻將
孫可望燬之夜夢士元為厲懼而新之壯麗倍往日

初張獻忠破荊州召惠府樂戶十數行酒內有瓊枝者色

藝出羣獻命之次曰我雖賤豈肯以歌侑酒賊觴毅然弗從以刃挾之曰汝技止此耳我不畏死奈我何哉獻忠嚮之喂犬

同時有曼仙者獻忠亦召至極逞技能刻意逢迎獻忠大悅寵倖無比獻忠每夜將寢必豪飲曼仙侍置毒於酒湍斟酒以奉獻忠蛇之以手挽其頸曰汝先飲此却之不得立飲而斃獻忠始覺碎裂其屍

夾江有偽令王某者進新荔枝於賊剖其中漬之以鹽獻大怒令近侍王珂就縣署斬之既遣左右曰彼鄉人也不

識好惡罪不至死獻遽云你說的是即傳旨去其旨為奉
天承運皇帝詔曰王珂你回來饒了夾江那個龜知縣然
偽詔資陽有人藏之今存

獻忠有號曰敬軒在房穀受招時自取也見於破鄆陽日
方岳宗之呼

有云百姓剖獻屍見其心黑如墨或傳其心偏而無肝
獻埋屍處叢艸如棘誤觸之輒成大難又常有黑虎守墳
睹人人皆遠之

叙州有人避賊逃入深山艸衣木食甚久與麋鹿無異後

見官兵以為賊復至也驚走上山行步如飛追者莫及其身皆有毛云

下蒲丹稜間嘗賊過時有數人逃入深箐中夜出見一黑犬入跨山而下至死人叢拾其頭兩手抉裂吸髓而去明起視之無遺腦矣蓋夜叉之屬也

寄園寄所寄云獻忠開科取士會試進士得一百二十人狀元張大受華陽縣人年未三十身長七尺頗善弓馬羣臣謫獻忠咸進表疏稱賀謂皇上龍飛首科得天下奇才為鼎元此實天降大賢助陛下不日四海一統即此可卜

也獻忠大悅召大受其人果儀表豐偉氣象軒昂兼之年
齒少壯服飾華美獻忠一見大悅左右見獻忠欣悅又從
旁交口稱譽以為奇士古今所未有獻喜不勝賞賜金幣
刀馬至十餘種次日大受入朝謝恩面見獻忠左右文武
復從旁譽其聰明學問及詩文畫一切技藝獻忠愈喜召
入宮賜宴諸臣陪宴惟樂竟日臨散以席間金銀器皿盡
與之次早大受復入朝謝恩叩首畢諸臣復稱賀曰陛下
龍飛之始天賜賢人輔佐聖明此國運昌明萬年丕休之
象陛下當圖其像傳播遠方使知我國得人如此奇異則

敵可不戰而服矣獻忠大悅遂召畫工圖其形像又大宴
羣臣飲歡羣臣席間又極口稱譽獻忠復賞賜美女十人
甲第一區家丁二十人次日獻忠坐朝文武兩班方集鴻
臚寺上奏新狀元午門外謝聖恩畢將入朝面謝聖恩獻
忠忽頓感曰這驢養的啗老子愛得他紫但一見他心上
就愛得過不的啗老子有些怕看見他你們快些與我收
拾了不可叫他再來見啗老子凡流賊以殺人為打發如
畫殺其衆則謂之收拾也諸臣承命即刻便將大受綁去
殺之並傳令將大受全家及所賜美女家丁盡數斬戮不

留一人。

蜀中古跡盡燬於賊惟李衛公籌邊樓在保縣城中賊未至故至今猶存

偽平東孫可望等東走復陷重慶守將曾英死之○初英起兵合州以涇陽李占春項城于大海為左右二人皆英腹心舊將以勇聞一鼓克復重慶而邑紳刁化神集土人助英共結陣塗山水陸聯進四十里獻聞之顧劉文秀曰楊展不足忌重慶要害地不可失因遣文秀往爭之英令占春大海逆之多功城文秀大敗而還至是大兵誅

獻偽平東可望四將之兵潰而東下時英守重慶賊突至
佛圖關出英不意攻之英中矢而顛於渝河以歿李占春
于大海收殘卒二千退入涪州英福建人以偏裨著功夔
門累績至總兵永明王假制封平蜀侯威名為賊所憚起
兵時欲屯田於重慶督師王應熊不許有識者惜之

孫可望入涪江○有四姑羅氏女年十四其父大道引匿
老鶴沱邊被搜投水死有邑人翁臺妻康氏為賊所獲不
辱殺之

督師王應熊卒于畢等○可望等兵至應熊力不支遁入

永寧旋卒於畢節衛一子陽禧死亂兵中竟無後應熊巴
縣人萬歷四十一年進士其行述俱載明史

丁順治四年○是歲明孽各分據蜀

春正月孫可望等陷遵義○初賊據全川惟遵義未下為
王祥所守及獻誅可望等四偽將東走大兵追之以糧
盡引還賊遂陷遵義

樊一蘄再駐江上○我師既還王祥等入保順二郡一蘄
復駐兵江上為收蜀計上書永明王王以為戶兵二部尚
書加太子太傅諸將祥等進爵有差時于大海據雲陽李

占春據涪州袁韜據重慶譚詣據巫山譚文據萬縣譚宏
據天宇城侯天錫據永寧馬應試據瀘州王祥據遵義楊
展據嘉定朱化龍曹勛等各據地自擅而宗室朱容藩故
偏沅巡撫李乾德以總制至楊喬然江爾文以巡撫至各
署置官於是全川盡附永明王

孫可望攻永寧知州曾異撰死之○異撰榮昌舉人知永
寧州賊至州人望風欲遁時江津進士程玉明貢生龔懋
勲在州署謀於異撰曰州據盤江天險扼吭全滇棄之不
守非人臣義也異撰因激兵士竭力拒守賊大至城陷閤

室自焚王明懋勲俱投火死自是黔西諸郡望風瓦解
孫可望入雲南○可望既下貴州諸郡邑遂直趨雲南取
會城據之

時蜀人死於滇者巡按羅國瓛夏衍虞王運開及弟運閔
國瓛嘉定人崇正癸未進士巡按雲南衍虞江津舉人曲
靖司李署道事雲南破衍虞與國瓛書約義舉兵事覺二
人俱盡室死

王運開字亘錄夾江人崇正庚午孝廉為永昌推官可望
兵攻永昌運開結同官協力禦守以圖外應城陷整衣冠

向北再拜死之

運閻字亨籙壬午舉人蜀亂往滇避禍且以省兄及至永昌陷運開死迺口占曰行來漸近永昌府吾兄英靈如欲語弟兄不作兩截人魂魄同歸見父母遂投江死滇人至今以雙忠稱之

蜀碧卷四

仁

起順治戊子止
帝康熙二年癸卯

丹溪生彭遵泗磐泉編述

戊子順治五年○明孽尚分據蜀

○先是崇正中川賊有姚天動黃龍聚黨劫掠巡撫陳士奇
及道臣陳其赤葛徵奇郡守王行儉巴令王錫營將趙榮
貴等設奇夾擊斬賊一千七百有奇生擒渠魁馬超一斗
麻代天王等二十餘人賊奔脫他徙而沔縣人袁韜因姦
孀事發逃投響馬賊馬潮呼九思等繼踵姚黃日事掠殺
及獸入遂乘勢據蓬州儀隴南部各地方殺老幼擄精壯

掘墓開墳生死無得免者數年間烏合愈衆分為十二大隊時歲飢賊以人為食 順治二年我巡撫李國英大破諸賊於遂寧之曠虛壩九思潮等走死輜以殘卒數百奔川東歸樊一薊

○諸賊或稱四家或稱十三家袁韜武大定及夔州譚文譚諸譚宏巫山劉體純鄧城胡明道金城姚玉川施州衛王光興皆甚著其王有進景果勒張顯劉惟靈白蛟龍楊炳英李世傑等莫可稽考總所謂十三家賊也

○又獻忠未敗李自成之衆先潰出關袁宗第賀珍之徒僅

郝搖旗李本榮黨守素李永亨等約結十三家出入巴渠
巫峽間則所謂西山寇也

又各州縣亂民號土暴子以打衙靈為名凡胥吏之有聲
者糾衆擣之或抄之水或昇諸火甚則鬻食其肉官司東
手無可如何而一時紳士家豪奴悍僕戕滅其主起而相
應深山大谷中豎寨柵標旗幟攻劫鄉里以人為糧其惡
殆與獸等其時川南川北畏土暴子甚於流賊也時蜀太
饑人相為食先是丙戌丁亥連歲洊饑至是彌甚赤地千
里糲米一斗價二十金蕎麥一斗價七八金久之亦無賣

者蒿芹木葉取食殆盡時有裹珍珠二升易一麪不得而
殆有持數百金買一飽不得而死于是人皆相食道路餓
殍剥取殆盡無所得父子兄弟夫妻轉相賊殺其食人之
法亦有如下羹羊饒把火和骨爛等名目雞肋篇所載云
云也

外王父遜菴先生云往時避寇山中經過一茅屋突烟騰
起疑為居人直入見釜中所煮皆人手掌腿足等物駭愕
失聲時幸主者出外不然難免

家老僕云宅外里許有餓死於道者某某謀夜定刺之至

則土存一頭先為人所攫矣余兒時見親故中老叟數人目黃如蠟詢之皆啖人肝所致者

眉州民有陳大五劉尚等居城南外五里賀家橋有李三樹熟而不取計以誑行人使之竊李掩擒殺食前後所食甚衆庚寅年事定被害民陳五春首於官捕大五等斬之民始安枕

其時瘟疫流行有大頭瘟頭發腫赤大幾如斗有馬眼睛雙眸黃大森然挺露有馬蹄瘟自膝至脛青腫如一狀似馬蹄三病中者不救

又鬼魅白晝出見與人爭道夜則聚於室中噪聒不休其名夢魂魔者人方就枕隱隱有物攝魂去傍有覺者疾呼可活少頃難救抹臉魔者黃昏時面皮自脫若剝削然不知所之二物來時形影模糊死者甚衆蓋殺却之餘也故老云夢魂魔可以趕逐而抹臉魔必明火震鼓以守之最難防備

又遭亂既久城中雜樹翳蔚成林人家遺犬食賊所殺人肉多銼牙若猛獸羣聚為寨利刀不能攻為害滋甚又多虎豹形如魑魅饕餮然穿屋顛踰城樓而下搜其人必重

傷斃即棄去不盡食也白晝入城市遺民數十家日報為虎所害有經數日而一縣之人俱盡殘者

諸將相攻○時全川未附諸將據地自擅故巡撫李乾德者少遇異人授天書善占驗諸將中惟許袁韜武大定韜故姚黃餘孽大定則小紅狼別部也乾德欲與就功結二人為心腹先是李占春部將董子金有萬縣湖灘之戰韜亦返鬪入佛圖關規重慶為已功長至大會韜自以位高踞李上占春不平心惡之乾德又陰為構難占春遂並惡乾德乾德夜坐船屋仰視星氣咄咄謂今夕主急兵徒步

走匿嵯谷頃之占春襲袁不克搜乾德船無所得取其孥
以為質韜聞乾德亡大哭既迎至甚喜占春是日亦歸其
孥袁武遂居重慶占春駐涪州之西平壩四面阻水結萬
將營賓客多歸之于大海壁忠州花陵河與李唇齒遵義
守將王祥忌于李之盛而又欲為好於袁也許請占春議
事伏兵執之軍中守者懈占春踰垣出殺追者一日夜歸
其壩上營祥尋與韜兩相責望而楊佺亦與祥有隙遣子
璟新政之璟新先襲殺馬應試與祥戰敗歸因是諸將相
惡

袁韜武大定歸楊展○袁武久駐重慶士卒飢李乾德遣人說展與合兵因其餉展喜納之誓為兄弟徙韜屯犍為大定屯青神厚給其貲共犄角以防賊

丑巳順治六年○是歲明孽相圖賊復自滇入蜀

朱容藩自稱楚世子建行臺於夔州稱制拜封○時楊喬然已進總督范文光巡撫川南呂大罷以大學士來督師皆惡容藩共謀誅之

李乾德使降賊袁韜武大定刺楊展○李占春素與展善展以銀萬兩米萬石餽之袁武不說乾德怨展遇已簡略

陰勸袁武圖展三人合謀會展壽詭稱介置宴於特為請之展坦然不疑以一僮隨往既至三人益為恭謹疊相酬勸展連飛數十觥大醉昇之密室令力士刺之

展起家武科以進士第三人及第智勇冠諸將獻賊深畏之川西東之起兵者倚為長城既死人心解體士無固志矣是時已進爵華陽伯

袁紹武大定圖嘉定三月陷之○袁武驍毅展以基嘉定定展子璟新力拒之三月城陷璟新以親丁三百騎逃出其妻陳氏指袁武罵曰爾等窮來依我先人處以縣邑

資以多財何負於爾迺圖我家真喪心犬彘也袁武殺之
悉併展之貲與衆乾德遂勸袁武保據嘉定○璟新崇正
壬午武舉展長子

時州生員帥正邦母馮氏孀有姿袁武強迫入贅馮氏
舉簪自刺死

李占春聞展被害率兵為展報仇不勝而歸曹勛與展刎
頸交時亦默然而阻樊一蘄投書責乾德曰嘉陵峨眉間
二三遺民不與獻忠之難者楊將軍力也且背施忘好而
取人杯酒之間天下其謂我何乾德笑以為救時大計詎

監儒所能知耶然蜀紳士無不切齒乾德者

初王應熊既沒兵部尚書呂大器奉永明王命來川至涪州與將軍李占春深相結楊展及于大海胡雲鳳袁韜武大定譚宏譚詰譚文以下皆受約束大器因歷遍諸鎮謂監軍道陳計長曰楊展志大而踈袁韜武大定忍而好殺王祥庸懦不足仗事尚可為乎後忽於石碛司夜遁走黔之獨山州鬱鬱疽發背卒

庚寅順治七年○賊與明孽各分據蜀

朱容藩歿死崇陽○容藩據夔府自稱天下兵馬副元帥

呂大罷檄李占春于大海討之容藩窘迺北依二譚兵以
攻石砮占春來援容藩兵敗走死滎陽

秋九月孫可望復遣兵圖蜀○可望在滇聞袁韜武大定
賊害楊展將圖蜀迺上書永明王為展訟寃使王自奇將
兵向川南而別遣劉文秀白文選取遵義

劉文秀攻王祥於烏江祥敗自刎死○文秀文選等以兵
至烏江王祥力戰不勝自刎死文秀降其衆二十萬盡收
遵義地初獻入蜀畏祥不敗窺遵義前後拒守凡八年至
是敗死聞者惜之時已晉爵恭江伯

劉文秀渡金沙江攻建昌原任長沙知縣高明死之○文秀遣別將盧名臣取重慶而已引兵渡金沙江攻建昌高明集士民拒於焦家屯賊兵勢衆力不敵歎曰我受朝廷官豈可從賊乎遂盡室自焚死

劉文秀攻陷越雋○寇攻城指揮王自敏妻周氏知不免謂所親唐氏曰前後等死耳他日恐其遲也遂挽唐氏入室自焚同時王氏俞氏宋氏唐氏俱赴火死皆受聘於人而未嫁者

劉文秀攻黎州土千戶馬亭李華宇等戰死○初亭華宇

及楊起泰等佐馬京破賊於龍觀川賊敗去沉黎不被冠
者數年京卒事曩為千戶文秀至竭力拒守被執不屈執
華宇苦戰為賊擒剛之時年八十四指揮丁應選亦以年
老亡於陣前共起兵富庄姜黃李奈蔡包張七姓子弟頭
人俱戰死無一降者

劉文秀攻陷榮經知縣黃儒死之○儒福建舉人城陷巷
戰被獲不屈賊磔于縣之開善寺

劉文秀罷曹勛於雅州取之○勛初敗賊於雅州保據其
境與楊展相聲援展死勛勢孤而劉道貞先以病卒范文

光因惡李乾德設展入山不視事勛左右無人文秀突至
出勛不意取之

劉文秀屯兵于天生城○城在洪雅花溪口賊至踞之時
余飛單騎出戰為賊所圍力殺十數人死陣中

順治八年

○明孽與賊尚分據蜀

文秀大敗索韜武大定於嘉定降之○初王自奇兵至川
南索武拒之聞劉文秀至撤兵還戰六戰六勝有輕賊心
俄而文秀起大兵壓其前自奇從後泝流尾擊一戰韜與
大定大敗悉就擒降於賊賊遂取嘉定

李乾德被執載舟中不食者數日屆月波澤語弟升德曰
吾父死於獻也吾不可以再辱遂偕升德並閤家人俱赴
水死

乾德殺楊展蜀人惡之其將死也無稱之者且曰賊復入
川實彼名之雖死能蔽其辜乎

重慶復陷於賊○文秀既取嘉定舉兵東下而前破遵義
時所遣別將盧名臣者入涪州李占春逆戰於羣猪寺口
而敗于大海在忠州力不支遂共放舟出夔門走荆楚降
於

王師諸將盡散無一人敢應敵者譚宏譚詣譚文皆降文秀

壬辰順治九年○是歲王師征蜀川南平

正月劉文秀復還雲南○文秀還雲南令白文選守嘉定
劉鎮國守雅州

三月

王師南征下嘉定○我師至鎮國文選俱敗挾曹勛走巡撫川
南范文光賦詩一章仰藥死時安綿道詹天顏兵敗被執
亦死之文光內江舉人先官南京戶部員外天顏龍巖
人起家選貢生

先是師至眉州向成功有衆五千據守石佛棧大兵攻之破其柵成功中流矢死眉州平

秋九月樊一蘄卒○一蘄初以戶兵二部尚書加太子太傅督諸文武恢復全川及諸將相攻令多不行而袁武殺楊展王祥敗死烏江列鎮兵多散所保惟叙州一郡不得志遂謝事居山中再聞范文光詹天顏朱化龍相繼為憂鬱遘疾卒

癸巳順治十年○是歲○王師破賊川北

王師大破賊將文秀於川北○劉文秀及白文選率兵來攻大

兵奮擊破其象陣文秀等大敗

王師平蜀○自甲午以後蜀地漸歸版圖而諸賊之負固者猶出入重夔巴峽間及順治十六年己亥譚宏譚詣共殺譚文文安之率劉體仁袁宗第李來亨等十六營由水道襲重慶聞之欲討宏詣二人懼率所部來降未幾

大兵取重慶叙州馬湖等屬時三郡為賊將盧名臣所據我梅勒章京葛朝忠總兵陳德楊正泰水陸並進攻破佛圖關直抵賊巢擒斬無數降牟勝赦而用之獻逆孽之擾蜀者盡矣

初闖賊餘孽李赤心竄死廣西南寧間其子來亨代領其衆走川東分據川湖間耕田自給而先潰出關之郝搖旗名永忠袁宗第及劉二虎等共依給之時獻黨雖盡永忠第尚據巴東康熙元年壬寅冬十二月我總督李國英奉

旨統秦豫廣三省兵將會四川進剿師駐萬縣賊棄夔州國英兵至夔道路榛莽伐山開徑以入二年癸卯元日進奪羊耳山宗第遁入深箐我師屯七里壩宗第屯茶園坪山勢陡絕諸將攀藤而上宗第敗走巴東大兵追及巫山

遂據其城衆議移守夔門督師計巫山地勢卑狹雖馳驟
不便可利固守於是深溝堅壘具炮石城下樹梅花樁檣
外挑品字坑賊至不得進又於城外高處立敵樓以防偵
探具甫備郝永忠劉體純合數萬衆攻巫山甚急我兵出
戰體純等敗走適陝西會剿兵至陳家坡奪老木空體純
自縊大兵乘勝追至黃草坪袁忠宗第皆授首惟李來亨
居茅麓山高險難攻我兵四面圍之來亨出入地名通梁
路徑懸絕我師蒙霧直上遂奪通梁來亨力窮勢迫八月
初六日焚其妻子自縊茅麓山破馬騰雲拓天寶王光燾

俱納欵投誠至是闡華之在蜀所謂西山寇於是盡全蜀
收入版圖一統萬世蜀人始獲享昇平之福矣

蜀碧附記

江津曹立卿府學生也賦性端方為鄉里所矜式煤山之
鑒公聞之北向泣血悲憤成疾及賊據川懸偽職逼勒士
紳公誓死不從疾劇戒子快曰吾家世受國恩汝又弱冠
登賢書茲大節攸關之日失身取義山爭些子吾一往自
反無愧可謂得全爾勉之為間曰我此時若存一貪生念
便如烈火燒身想到守身全節即入清涼境界囑畢而逝
夾江宿士敏字元魯崇正丙子孝廉賊官至邑迫之出佯
應之治裝赴省至千佛崖策馬投江賊信其已死不復問

已而潛過江岸乘夜走雅州山中易姓名以節終

宋文翼字怒飛丹稜人以應貢入國學授蜀藩長史甲申
巡撫陳士奇巡按劉之渤重其才授以監軍事及獻破成
都歸隱深山不出

郝孟旋川西舉人嘗起兵復雅州復與邛州劉道貞合兵
攻邛不克退守沈黎後不知所終

汪光翰字文鄉婺源人竟陵胡恒官川南道光翰為幕客
獻兵至臨邛恒命光翰出調兵并檄寧越守備楊起泰將
兵援邛未至而城陷與其子士驊戰死閭門百口遇害惟

士驊妻朱氏洎幼子我生得脫匿民間隨士驊母舅陳君
美者轉徙榮經縣降賊武大定駐嘉定聞朱氏有殊色劫
致之朱汚面毀容以免堅操撫孤光翰間闕彛裸中得朱
氏母子所在事之甚謹值劍南大饑斗米十金光翰不避
刀俎多方保護之母子迺得全自是或服賈或課蒙或為
僧獲稍贏餘以給饘粥廿餘年不倦朱氏教子極嚴我生
亦讀書知自奮能文章矣蜀平狹路通光翰迺送朱氏
母子歸竟陵于是楚蜀莫不高朱之節誦光翰之義以為
忠臣孝子之報云 又有鍾之綬者字楷士亦竟陵人從

胡公入蜀遊我眉遂不歸聞胡公父子殉義迺自瓦屋山至榮經與光翰同撫孤兒歷八年所入滇至昆陽死

王承祖劍州御史梁之棟僕也獻據蜀之棟子田璧知不免止一五歲兒名繩武召承祖夫婦屬之曰一綫之脉盡寄於汝其善保之梁氏一家俱遇害承祖負繩武及已子走賊追及棄已子而匿繩武巖穴中得脫後土賊起知繩武所在欲率其貲承祖負之乞食山中及賊息始出承祖為之耕耘婚娶延師教訓至本朝庚子舉於鄉

曹椿明末名士也獻逆後奉永明王命來宰夾江其時四

野蕭條烟戶鮮少椿至招流亡撫餘燼又急收士人以時
訓課嘗見城外大明寺考錄儒童詩云高樓野望影蕭蕭
盡日無僧伴寂寥寺號大明知一統梁題萬歷紀先朝治
軍久已霜生鬢課士猶然劍繫腰濁酒一杯聊自適平原
芳草倍魂銷時縣署燬於賊故於此試士公所作有鵲血
集為哀國之音云

李甲湖廣蒲圻人由舉人知雙流縣崇正甲申委署建昌
監理廳至榮經值賊犯雅安義師戰潰甲隨師奔走力竭
死一僕守甲喪數年楚路通始載以歸

富順盧元卿字調元天啟丁卯解元累官陝西寧夏道闖
賊臨泰托迹黃冠潛遁秦徽間自題云生平志氣凌霄漢
自許惟憑忠孝心家國陸沉身板蕩空拋血泪寄兒孫卒
葬於隴徽人慕義祀之

雷雨津字起劍井研人崇正甲戌進士官兵部嘗過楚題
洞庭廟云我是人龍君亦能吾今胡為乎泥中憑君借得
青驄雨手攬風雲滿大空甲申從張公玉簡監軍死○其
子廷後知吳江縣

李俊英南部人府學生姚黃賊掠南部俊英泣涕指衆

兵旬日得千人禦賊江岸屢戰俱捷賊不敢南日久糧匱
其弟泣告曰我等冒矢石城中人相繼遁去無捷矣苟暫
退俊英叱之曰寧為君父死不為一身生自是毋敢言退
者賊計窮將引還會同事有忌俊英者噪而南奔賊得從
下游渡圍之數重俊英奮勇突圍多殺傷乃得出還至江
岸投水死

劉養貞大邑人以進士任湖廣漢陽府推官陞部郎闖賊
犯都懷宗崩國養貞為時服蚤著悲勞不輟令貧邸舍以
賣卜為生人呼為劉孝子病終於燕京

哀蜀藩

天社星隳古社壇，杜鵑聲盡石苔癢。
井花清冷無人汲，留得丹心萬古寒。

張象華

邊徼錫封憐少子，蜀王臺殿獨崔嵬。
誰從輦路鳴鞭過，猶記宣門拜刺來。
胥井寒泉沉鳳羽，天堦白日走龍媒。
短塼桃李家家發，畫角聲中杜宇哀。
陸海塵飛井絡昏，錦城茅屋半江村。
遺言日落牛羊過，野市人稀虎豹蹲。
樹裏冥冥香徑遠，海棠酸醱翠雲繁。
摩訶但有支機石，尚共銅駝

卧草根

呂潛

萬歷末年民間好葉子戲圖宋時山東羣盜宋江姓名於
牌而鬪之至崇正時大減法以百貫活減為盛負曰闔曰
獻曰大順其後皆驗云

崇正十七年正月銅仁連界掘出古碑有字三行云東也
流西也流流到天南有盡頭張也敗李也敗敗出一箇好
世界或以為武侯所遺云

彭瑄字予白永川人崇正時以進士為給事中闢入京脅
降不從自刎死

顧鉉號青城成都人崇正時進士為給事中闢入自刎未

絕復被執毒拷罵賊死

蜀君附記終